

LISTOVI GRAČANIČKOG KALENDARA OD 25. 5. DO 2. 11. 2010.

Dr. sc. Omer Hamzić



27. 5. 2010.

**19. SJEDNICA OPĆINSKOG VIJEĆA: U ZNAKU IZVJEŠTAJA
JAVNIH KOMUNALNIH PREDUZEĆA**

Od 12 tačaka dnevnog reda, pored Odluke o dodjeli općinskih priznanja (koja će biti dodijeljena na Dan općine, 2. 6. 2010.), najviše pažnje vijećnika privukao je Izvještaj o radu i finansijskom poslovanju JP “Vodovod i kanalizacija” za 2009. godinu. Uz ostalo, spominjala se loša situacija oko vodosnabdijevanja u Lendićima i Bijelim Poljima. Odgovorio je direktor Preduzeća mr. sc. Fuad Alić da projektne ideje za rješenje spomenutih kao i drugih problema postoje, ali za njihovu realizaciju nedostaju sredstva, pogotovo u godini krize i recesije. Osim ovog, vijećnici su usvojili i Izvještaj o radu i finansijskom poslovanju JP “Komus” d.o.o. Gračanica za 2009. godinu, Izvještaj o radu općinskog pravobranilaštva za 2009. godinu, te rješenja o izmjeni rješenja o izboru komisije za praćenje položaja boraca, RVI, porodica šehida i poginulih boraca, o izmjeni rješenja o izboru etičke komisije. Zanimljive su bile i tri informacije: o sakupljanju, odvozu i deponovanju komunalnog otpada na području Općine Gračanica, o radu i vršenju nadzora općinskih inspekcija u 2009. godini i o kapitalnim ulaganjima u infrastrukturu u 2009. godini. Kroz informaciju o kapitalnim

ulaganjima, vijećnici su upoznati da je u komunalnu infrastrukturu uloženo 3.606.957 KM, od čega u puteve 820.505, vodosnabdijevanje i kanalizaciju 416.479, javnu rasvjetu 129.237 i ostalu komunalnu infrastrukturu 1.026.201 KM. Infrastrukturna ulaganja u sportske objekte i domove kulture iznose ukupno 1.214.533, od čega se najviše odnosi na kupovinu sportske sale "Luke".

28. 5. 2010.

LUKAVICA: ČETVRTA INTERNACIONALNA SMOTRA FOLKLORA I SEVDAHA

Ovogodišnja smotra koja se pod motom "Igram i pjesmom do tolerancije i razumijevanja" po četvrti puta održala u Lukavici u organizaciju KUD "Lukavica" i po obimu i po kvalitetu kvalifikovala se među nekoliko najvažnijih kulturnih manifestacija na području općine Gračanica. Učestvovalo je 10 kulturno-umjetničkih društava i grupa iz Bosne i Hercegovine (Gračanica, Brčko, Sjenina, Škahovica, Babići) i Hrvatske i Slovenije (Vinkovci, Ljubljana, Rijeka) sa oko 120 učesnika. Pored kvaliteta programa koji je prezentiran u Lukavici i Gračanici, iskrene čestitke i pohvale zaslužili su Lukavičani, kao domaćini. Zato iduće godine s pravom očekuju još veću podršku i pomoć u organizaciji 5. internacionalne smotre folklora i sevdaha.

2. 6. 2010.

DAN OPĆINE GRAČANICA: SVEČANA AKADEMIJA I DODJELA TRADICIONALNIH OPĆINSKIH PRIZNANJA

Načelnik Općine Gračanica je u svom prigodnom referatu istakao rezultate koje je općinska uprava realizovala u prethodnoj 2009. godini: toplifikacija grada, otkrivanje spomen obilježja poginulim borcima/šehidima u ratu '92-'95, izgradnja i puštanje u funkciju nove zgrade Doma zdravlja, uređenje i asfaltiranje lokalne putne infrastrukture, organizacija Gračaničkog sajma itd. Zlatne plakete, kao najviše općinsko priznanje uručene su sljedećim dobitnicima: Mjesna zajednica Rašljeva, "Kovan" d.o.o. Gračanica i Evangelističko-metodistička Kristova



crkva Zwickau-Planitzh Njemačka. Općinsko priznanje Zlatna Značka koja se dodjeljuje pojedincima dobili su: Džaferović Miralem, Mešić Smail, Moralić Refija, Humić Fahir, Širbegović Faruk i Šerbečić Ibrahim.

3. 6. 2010.

"GRAČANIČKI GLASNIK": NA PROMOCIJI DVADESETDEVETKE KONAČNO OTVORENO PITANJE "BLAJBURG I BOŠNJACI"

Tema promocije i tema broja bila je 65. godišnjica završetka Drugog svjetskog rata. U centru pažnje bilo je istraživanje bošnjačkih žrtava tokom Drugog svjetskog rata na području općine Gračanica, koje je redakcija "Gračaničkog glasnika" privela kraju. Prezentirani su rezultati tog istraživanja za vangradsko područje općine Gračanica, koji su izazvali ne malo zanimanje prisutnih posjetilaca. Temu broja prezentirali su uz domaćine – dr. sc. Omera Hamzića i profesora Edina Šakovića – i gosti promocije dr. doc. Edin Mutapčić, prodekan Pravnog fakulteta iz Tuzle i dr. sc. Izet Šabotić, prof. na Filozofskom fakultetu u Tuzli i direktor Arhiva TK.

Bilo je i polemičkih tonova, budući da se tema bošnjačkih žrtava, a posebno bošnjačkih žrtava krajem Drugog svjetskog rata u

dogadjima koji se obično označavaju pod pojmom “Blajburg”, na ovaj način po prvi puta otvara u Bosni i Hercegovini.

22. 06. 2010.

KATASTROFALNE POPLAVE: OPŠTINSKI ŠTAB CIVILNE ZAŠTITE PONOVO PROGLASIO STANJE PRIRODNE NEPOGODE

Kiša koja neprekidno pada od sinoć izazvala je nove poplave na području općine Gračanica. Dok se sa zebnjom očekuje novi plavni talas sa hidroakumulacije “Modrac”, na kojoj vodostaj raste 2 cm na sat, Orahovička, Lohinjska i Pribavska rijeka već su se izlile na saobraćajnice i ugrozile skoro 200 objekata u Sprečkom polju. Sokoluša prijeti da presiječe saobraćaj u Pašalićima i već ugrožava objekte u južnom dijelu Gračanice (kod sportske sale, kod Saksa itd.). Ponovo je ugrožena trafostanica preko koje se električnom strujom snabdijeva područje općine Gračanica i Doboju Istok, ugrožena je Eko toplona, Roading, Isovoood, objekti kompanije Širbegović... Rijeka Drijenča je već je po-

plavila put prema Malešićima. Iz svog korita se izlila i Lukavička rijeka i poplavila nekoliko kuća. Stanje na području Prijekog Brda i Džakula je nešto stabilnije.

Opštinski štab civilne zaštite poziva rukovodstva mjesnih zajednica, privrednih organizacija i građane da sami preduzimaju mjere na spašavanju, prije svega ugroženih života i imovine s kojom raspolažu. Opštinski štab civilne zaštite i dalje prati situaciju i preduzima mjere na otklanjanju neposredne opasnosti od poplava na području općine.

28. 06. 2010.

BOŠNJAČKI INSTITUT U SARAJEVU: SIMPOZIJUM O ŽIVOTU I DJELU PROF. TAJIB EF. OKIĆA

Ovaj naučni skup organizovan je u okviru programa “Dani Ajvatovice 2010.” Organizator skupa, bila je organizacija Wonder iz Beča, a visoki pokrovitelji–Rijaset Islamske zajednice u Bosni i Hercegovini i Predsjedništvo vjerskih poslova Republike Turske. Simpozijumu su prisustvovali znanstveni-



ci iz naše zemlje i Turske, od kojih su mnogi učenici prof. Okića. Među prisutnima na skupu su bili i Reis-ul-ulema prof. dr. Mustafa Cerić i Predsjednik Predsjedništva vjerskih poslova Republike Turske prof. dr. Ali Bardakoolu. Po programu simpozija obrađene su teme o djetinjstvu prof. Okića, koje je proveo u rodnoj Gračanici, zatim o njegovom školovanju, porijeklu njegove porodice, radovima na jezicima na kojima je pisao, doprinosu koji je dao pojedinim znanstvenim disciplinama i općenito razvoju teoloških fakulteta u Turskoj.

Muhamed Tajib Okić je rođen 1.12.1902. godine u Gračanici, gdje je proveo svoje rano djetinjstvo – do 1910. kada se sa roditeljima seli u Sarajevo. Školovao se u Sarajevu, Zagrebu, Beogradu i na Sorboni. Svoj radni vijek započeo je kao nastavnik Prve muške gimnazije, potom na Velikoj medresi u Skopju, a nakon toga prelazi u Tursku ambasadu u Beogradu za prevodioca. Drugi svjetski rat ga odvodi u Istanbul, a potom u Ankaru, gdje nastavlja svoju karijeru akademskog radnika. Predavao je na Univerzitetima u Ankari, Erzurumu, Konji, Izmiru i dr.. Pisao je na bosanskom, turskom, arapskom i francuskom jeziku. Njegova privatna biblioteka nalazi se na Ilahijat fakultetu u Izmiru.

Iako je najveći dio svoga akademskog rada proveo u Turskoj, on je izrazio želju da bude ukopan u svojoj zemlji. Tu želju su mu, iako sa velikim teškoćama, uspjeli ispuniti njegovi učenici. Prof. Okić je preselio na ahiret 1977. godine, a ukopan na mezarju Bare u Sarajevu.

U Republici Turskoj nije moguće govoriti o islamskim znanostima bez Tajiba Okića. On je bio obnovitelj, utemeljitelj i graditelj te znanosti od 1949. godine, kada se osniva prvi Teološki fakultet u Republici Turskoj, sa sjedištem u Ankari. Od tada prof. Okić proizvodi profesore koji će ga naslijediti na mnogim katedrama širom Turske. Njegove prepiske sa našim ljudima nisu prestajale sve do njegove smrti, što je samo potvrda

koliko mu je nedostajala zemlja koja ga ni mrtvog nije htjela primiti. Simpozij o Muhamedu Tajibu Okiću je, kako su govorili njegovi organizatori i učesnici, naš pokušaj da se zahvalimo ovom velikom čovjeku na svemu što je učinio za dobro naših ljudi i naših prijatelja u Turskoj. Današnja Turska je rezultat i njegovog dugogodišnjeg, upornog, predanog rada.

Pozdravno pismo sa željom da ovaj naučni skup što bolje uspije, na adresu organizatora, u ime Gračanice, rodnog grada Tajib ef. Okića, uputio je općinski načelnik Nusret Helić i obavijestio učesnike da je, u čast tog velikog Gračanlije, jedna ulica u ovom gradu odnedavno ponijela ime Tajib ef. Okića, a najesen je planiran i jedan Okrugli sto o njegovom liku i velikom djelu.

30. 6. 2010.

20. SJEDNICA OPĆINSKOG VIJEĆA GRAČANICA: ODOBRENO ZADUŽENJE OPĆINE ZA IZGRADNJU I DOVRŠENJE KLJUČNIH SAOBRAĆAJNICA NA OPĆINI

Pažnju vijećnika na ovoj sjednici najviše je privukla Odluka o davanju saglasnosti Općinskom načelniku da može izvršiti zaduženje Općine kod izvođača u svrhu izgradnje putne infrastrukture do cca 350.000 KM. Radi se o slijedećim putevima i ulicama: Lendići – Kamenolom (neophodno obezbijediti cca 55.000 KM da se završe dionice započete i pripremljene prošle godine, kako ne bi došlo do stradanja već pripremljenih dionica), Piskavica–Regionalni put Gračanica–Srnice (neophodno obezbijediti cca 60.000 KM, kako bi se završili radovi započeti još pretprošle godine i tako ova mjesna zajednica preko regionalnog puta bila povezana sa centrom općine), Zvijezda – Babići–stari kamenolom (neophodno obezbijediti cca 35.000 KM kako bi se završila kompletna dionica i ova mjesna zajednica kao posljednja na općini takođe bila povezana sa centrom općine), Kej Fridriha Foglara u Gračanici (neophodno obezbijediti cca 150.000 KM i poslije postavljanja toplovođa definitivno srediti ovu ulicu, koja je već odavno u jako lošem sta-



nju), Ulica 22. divizije (neophodno obezbijediti cca 50.000 KM kako bi se definitivno ova ulica sredila i duž cijele njene dionice riješilo pitanje odvođenja oborinskih voda od Asa do iza Etne),

Dakle, ovom Odlukom se predviđeno je ukupno zaduženje koje ne može biti veće od 350.000 KM, a stvarno koštanje će se utvrditi nakon provedenih procedura i sklopljenih ugovora sa izvođačem u kojima će biti utvrđeni i način otplate u 2011. godini.

Za Ul. Ahmed-paše Budimlije (od Skvera do zgrade Ahmetaša) planirana su sredstva u budžetu ove godine, ona je u najlošijem stanju jer je vršeno nekoliko raskopavanja zbog uređenja Japage, toplifikacije i rješavanja kanalizacije za neke objekte.

Glavni razlog za zaduženje je podbačaj prihoda u budžetu za prvih pet mjeseci, koji nije moguće riješiti rebalansom na račun nekih drugih stavki jer će i onako biti problem uravnotežiti budžet i dovesti ga do kraja godine bez deficita.

Nakon kraće i konstruktivne rasprave (u

kojoj je bilo nešto malo i predizborne retorike), od 26 prisutnih vijećnika "ruku za" odluku podiglo je njih 25, dok je samo 1 bio uzdržan.

Osim ove, jedna od važnijih odluka koje su donesene na ovoj sjednici je i Odluka o usvajanju i provođenju izmjene Regulatornog plana "Centar" (nacrt), kojom se konačno omogućava početak izgradnje planiranog objekta na prostoru bivše Robne kuće u centru Gračanice. Razlog za ove izmjene je pozicija objekta *Špar kase banke* (doskorašnje ABS banke), čiji vlasnici nisu mogli prihvatiti zajedničko učešće u izgradnji većeg poslovnog objekta, koji bi zahvatio kompletnu lokaciju na tom prostoru, niti su mogli naći neko drugo zamjensko rješenje sa DOO "Bosna" kao investitorom. Ovim izmjenama, spomenuta lokacija i objekat *Špar kase banke* se izuzima iz kompletnog rješenja i otvara mogućnost da investitor nastavi započete aktivnosti na tom prostoru u centru grada, čije rješenje građani Gračanice isuviše dugo čekaju. Odluka je na javnoj raspravi 30 dana. Pored navedenih,

vijećnici su usvojili i sljedeće odluke: o broju i visini stipendija za učenike srednjih škola i studenata, o promjeni statusa nepokretnosti u opštoj upotrebi, o izmjeni odluke o imenovanju Komisije za davanje stručne ocjene u postupku izdavanja urbanističke saglasnosti, o prestanku važenja Odluke o visini naknade predsjedniku i članovima Općinske izborne komisije. Pored ovih odluka, usvojen je dopunjeni izvještaj o finansijskom poslovanju JZU Dom zdravlja Gračanica za 2009. te dvije informacije: o zimskoj službi na području općine i o higijensko-epidemiološkoj situaciji na području općine.

Vijećnici su odlučili da izvještaj o procijenjenoj šteti od prirodne nepogode koja je uzrokovala pojavu poplava i klizišta na području općine Gračanica u periodu od 31. 5. – 11. 6. 2010. i dopunu izvještaja o štetama uzrokovanim poplavama u periodu 21. 6. – 28. 6. 2010., razmatraju na posebnoj sjednici, koja je zakazana za 1. 7. 2010.

1.7. 2010.

VANREDNA SJEDNICA OPĆINSKOG VIJEĆA: KAKO SANIRATI ŠTETE OD POPLAVA U PERIODU OD 21.06.2010. DO 28.06.2010. GODINE.

U nezapamćenim poplavama je u periodu od 01. 06. 2010. do 11. 06. 2010. godine pričinjene su velike štete na stambenim, privrednim, ekonomskim i infrastrukturnim objektima, kao i štete na poljoprivrednom zemljištu i poljoprivrednim kulturama. Aktivirano je 60 novih klizišta u svim mjesnim zajednicama (21), a najteža situacija je bila u Lukavici, Stjepan Polju, Malešićima, Rašljevi, Gračanici i Gornjoj Orahovici. Klizištima su oštećena 2 regionalna i 9 lokalnih puteva, 4 stambena objekta, a ugroženo 6 lokalnih puteva i 4 stambena objekta. Odluka Općinskog načelnika o prestanku stanja prirodne nepogode donesena je 11. 06. 2010. godine. Na teren su izašle komisije za procjenu šteta koje su utvrdile štetu u ukupnom iznosu od 4.378.540,67 KM.

I dok su se još uvijek evidentirale štete, područje općine Gračanica, 21. i 22. 06.

2010. godine, ponovo je zahvaćeno nevremenom, došlo je i do ispuštanja vode iz HA Modrac, pa su u vrlo kratkom vremenu svi lokalni vodotoci postali ogromne bujične rijeke koje su nosile sve pred sobom, zatvarale saobraćajnice, nosile manje mostove i druge slabije objekte i dijelove obale, poljoprivredne usjeve i zemljište, ostavljajući za sobom pravu pustoš. Pošto je veći broj ranije pokrenutih klizišta stvorio mnogo otvora (rana), u kliznom tijelu, nove padavine su dovele do ubrzanih pokreta tih zemljanih masa, pa je došlo do novih oštećenja na mnogim stambenim i drugim objektima, potpuno su prekinuti lokalni putevi u mjesnim zajednicama Lukavica, Malešići, Prijeko Brdo od rijeke Četovilje, Rašljeva, Gornja Orahovica, Donja Orahovica, Gračanica, Stjepan Polje, Vranovići, Škahovica, Soko, Pribava, Miričina, Donja Lohinja, Trnovci, Džakule, Buk, Piskavica, Babići, Doborovci, Gornji Doborovci, pa je Općinski načelnik, 22.06.2010. godine, ponovo donio odluku o proglašenju stanja prirodne nepogode od poplava i klizišta.

Općinski štab civilne zaštite je u skladu sa zakonskom regulativom rukovodio akcijama zaštite i spašavanja i preduzimao mjere na odbrani od poplava (odbrana trafo sta-



nice, uklanjanje prepreka u koritu Sokoluše, Drijenče, Pribavskog potoka, Orahovačke rijeke, intervencije na vodovodnim i kanalizacionim sistemima, uklanjanje odrona na putevima u cilju obezbjeđenja prohodnosti), a naredbom su isti zadaci postavljeni i vijećima svih mjesnih zajednica, te je veći broj njih angažovao mehanizaciju i građane na hitnim intervencijama na zaštiti objekata, puteva i sl.

Prema prijavama pristiglim u Općinsku službu za civilnu, od 01. do 11. 06. 2010. godine aktivirano je 60 novih klizišta, a u periodu od 22. do 25. 06. 2010. godine aktivirana su ukupno 82 klizišta i odrona što ukupno iznosi 142 klizišta—odrona.

Štete pričinjene nevremenom i klizištima u periodu od 01. do 28.06.2010.godine procijenjene su na ukupno 5.775.808,39 KM.

Nakon duge i konstruktivne rasprave vijećnika i predsjednika vijeća u mjesnim zajednicama, tokom koje su se tražila rješenja za prevazilaženje posljedica prirodne nepogode od poplava i klizišta, Općinsko vijeće je jednoglasno usvojilo izvještaj o procijenjenoj šteti od prirodne nepogode koja je uzrokovala pojavu poplava i klizišta na području općine Gračanica u periodu 31. 05.–11. 06. 2010. godine i u periodu od 21. do 28. 06. 2010. godine i zaključilo: da Komisija za procjenu šteta nastavi rad, kako bi se evidentirale štete koje nisu bile obuhvaćene ovim izvještajem, da se budžetska sredstva planirana za elementarne nepogode i druga namjenska sredstva iz budžeta ulože u sanaciju prioritarnih putnih pravaca oštećenih klizištima, da se od viših nivoa vlasti traže finansijska sredstva za sanaciju nastalih šteta, a od JP “Spreča” Tuzla da izdvoji i doznači finansijska sredstva za sanaciju šteta od poplava u Sprečkom polju.

21. 7. 2010.

KOMPANIJA “ŠIRBEGOVIĆ” UGOVORILA VRIJEDAN POSAO NA IZGRADNJU AERODROMA BERLIN-SCHOENEFELD U NJEMAČKOJ

Nijemci koji priznaju samo kvalitet i pre-

ciznost u izvođenju radova, prepoznali su u bosanskohercegovačkoj kompaniji sigurnog partnera na ovoj izuzetno važnoj investiciji. U isto vrijeme je stigla i vijest iz Saudijske Arabije da je ponuda kompanije Širbegović za izgradnju Ambasade Kraljevine Saudijske Arabije u Alžiru ocijenjena kao najpovoljnija.

Ponude za izvođenje radova na berlinskom aerodromu i ambasadi Kraljevine Saudijske Arabije investitorima su stigle iz cijelog svijeta. Stoga je odabir Kompanije “Širbegović” na ovim velikim poslovima na međunarodnom tržištu još jedno veliko priznanje ovoj građevinskoj kompaniji, koja u ovoj godini obilježava 20 godina uspješnog rada, a svoje poslovnice i firme ima u zemljama Regiona, EU i u arapskom svijetu. (Radio Gračanica)

01. 08. 2010.

“DOŠLA VODA U GORNJU ORAHOVICU” – DATUM ZA HISTORIJU SELA

Rijetko je kada Gornja Orahovica imala razloga za slavlje kao što je to bilo 1. avgusta. 2010. godine. Ovo selo otkako postoji bilo je selo vrijednih, dobrih i sitih, ali bukvalno žednih ljudi. Važilo je kao totalno bezvodan kraj, koji nije imao gotovo nikakvu perspektivu. Čak su i neki ozbiljni ljudi, koji imaju duboke korijene u tom selu, počeli razmišljati da od da se isele. Nakon otvaranja i puštanja u upotrebu novog vodosistema, sa izdašnjih bušotina, to će biti samo prošlost.

Od 2008. godine, kada su otkrivene velike količine vode na tom području Mjesna zajednica Gornja Orahovica vodi intenzivnu aktivnost da tu blagodat što prije stavi na raspolaganje građanima. Pored instalacija na bušotinama i vodozahvatu (bazeni, pumpe itd.) izgrađena je potpuno nova distributivna mreža, kao jedinstven sistem snabdijevanja vodom na tom prostoru. Novi vodovodni sistem u Gornjoj Orahovici čini 6 odvojenih podsistema: 1. Mehinbašići – Mujići – Mehići, 2. Mujići – Brđani – Manovići, 3. Džafići, 4. Avdići – Dobrnjići, 5. Husičići i 6. Birkovac – Ajkići.

Do sada je prijavljeno 510 priključaka, a vodovod je izrađen za kapacitet od 800 pri-

ključaka, što će biti dovoljno za narednih 30 godina. Trenutni kapacitet vode u bušotinama zadovoljava maksimalan broj korisnika. Ukupno je napravljeno oko 50 km mreže za čije punjenje treba 300 kubnih metara vode. U tehničkom pogledu projekat je koncipiran tako da u roku od 15 minuta od trenutka puštanja vode iz bazena svi građani mogu dobiti vodu. Mnogi građani koji nisu imali nikako vode, sada su prinuđeni da kupuju i ugrađuju ventile za obaranje pritiska – što je svojevrsna blagodat.

U protekle tri godine u ovu investiciju uloženo je ukupno oko 700.000 KM. Mjesna zajednica je u vidu novčanih priloga građana (taksa na priključak) obezbijedila 230.000 KM i u radu (izrada potrošačkog šahta i priključnog voda od šahta do domaćinstva) još 150.000 KM. Općina Gračanica je iz budžeta obezbijedila 215.000, a Vlada TK (Ministarstvo za poljoprivredu i vodu) 105.000 KM.

Mnogo je zaslužnih ljudi za ovaj uspješno izvedenih projekat, posebno u Gornjoj Orahovici, ali ipak – najzaslužniji je Vehid Osmanović, predsjednik Mjesne zajednice Gornja Orahovica, koji je od početka bio “alfa i omega” u ovom projektu. Zato je i dobio najveći aplauz svojih sugrađana na ovoj svečanosti i zaslužene pohvale, među kojima i pohvalu općinskog načelnika Nusreta Helića, koji je čestitao mještanima Gornje Orahovice ovu, zaista, historijsku radnu pobjedu.

7. 8. 2010.

47. DOBOROVAČKA PROSLAVA, BOGATI SADRŽAJI I MANIFESTACIJE, PROMOVISANA KNJIGA “DOBOROVCI KOD GRAČANICE – HISTORIJSKA MONOGRAFIJA” (AUTORI: DR.SC. OMER HAMZIĆ I MR. SC. RUSMIR DJEDOVIĆ)

“Dani Doborovaca” ili tradicionalna Doborovačka proslava i ove godine, 47. po redu, obilovala je nizom komemorativnih, sportskih i kulturno-zabavnih sadržaja koji su realizovani u periodu od 31. 7. do 8. 8. 2010. Ovogodišnju proslavu obilježila je promocija knjige “Doborovci kod Gračanice

– historijska monografija”, čiji su autori dr. sc. Omer Hamzić i mr. sc. Rusmir Djedović. Riječ je o naučnom poduhvatu, koji je inicirala Mjesna zajednica Doborovci i na kojem je spomenuti autorski dvojac radio pune tri godine. O značaju ove knjige za lokalnu historiografiju govorio je Doc. Dr. Edin Mutapčić, prodekan za nastavu na Pravnom fakultetu u Tuzli, jedan od recenzenata i prof. Edin Šaković, urednik edicije.

25. 8. 2010.

PRVI SOLARNI SISTEM GRIJANJA U GRAČANICI UGRAĐEN I PUŠTEN U RAD U OPĆOJ BOLNICI “MUSTAFA BEGANOVIĆ”

To je jedan od tri projekta koji se na općini Gračanica realizuju pod nazivom “Jačanje lokalne demokratije (LOD)” uz finansijsku podršku UNDP, u ukupnoj vrijednosti od 150.000 KM (Općina Gračanica učestvuje sa 15.000 KM). Službeni naziv ovog projekta je “Obuka uposlenika i menadžmenta malih i srednjih preduzeća na području općine Gračanica za proizvodnju isplativog solarnog sistema kao novog proizvoda za povećanje konkurentnosti i diverzifikaciju malih i srednjih preduzeća u sektoru proizvodnje. Vrijednost projekta je 65.029,10 KM, a realizovao ga je Centar za razvoj i podršku (CRP) Tuzla, kao nevladina organizacija.

Tokom obuke uposlenici šest malih i srednjih preduzeća iz Gračanice (doo “Mirna”, “Širbegović”, “Radijus”, ZD “Zimax”, SZR “Ajsmont”, ZD “Elektronik”), proizveli su prvih 15 solarnih kolektora, ukupne površine 30 kvadratnih metara, koji su, zajedno sa ostalom opremom solarnog sistema ugrađeni na objekat gračaničke Opće bolnice.

Riječ je o solarnom sistemu za pripremu 2.000 litara tople vode za vešeraj bolnice, koji treba da donese uštedu energije od 5.400 KM godišnje. Navedene gračaničke firme će nastupati zajednički u proizvodnji i plasmanu ovih kolektora. Čitav projekat je komplementaran projektu toplifikacije Gračanice na ekološko i obnovljivo gorivo, koji, što se tiče jezgra grada i industrijske zone, ulazi u završnu fazu.

27. 8. 2010.

**21. SJEDNICA OPĆINSKOG VIJEĆA:
DEFINITIVNO RJEŠENJE LOKACIJE BIVŠE
ROBNE KUĆE, IZVRŠENJE BUDŽETA I
FINANSIRANJE PROJEKATA MLADIH**

Nakon detaljnijih obrazloženja, sa 27 "za" i jednim uzdržanim glasom, od ukupno 28 prisutnih vijećnika u Sali, zaključena je tačka pod naslovom "Odluka o usvajanju i provođenju izmjene Regulacionog plana "Centar" Gračanica. Riječ je o definitivnom rješenju pitanja lokacije bivše robne kuće u Gračanici, koja čeka rješenje, praktično od završetka rata. Tokom proteklog perioda, a posebno u javnim raspravama bilo je raznih ideja, počevši od kupovine lokacije od vlasnika i njenog pretvaranja u gradski trg, do izgradnje velikih komercijalnih građevina koje bi odudarale od ambijenta gračaničke čaršije. Projektom rješenjima koja su usvojena prošle godine, najvećim dijelom udovoljeno je zahtjevima onih koji su tražili da se taj prostor uklopi u ambijent gradskog jezgra, sa manjim trgovom, stazama za šetnju, odgovarajućim pješačkim prolazima, manjim trgovinama, ugostiteljskim i jednim dijelom prostorima za stanovanje. Budući da je, govoreći rječnikom urbanista, predviđena izgrađenost tog prostora nešto ispod 50%, to je sasvim zadovoljavajuće za projektna rješenja gradskih centara, tipa gračaničke čaršije. Usvojena izmjena odnosi se samo na rješenje postojećeg objekta "Špar kase banke" (nekadašnji Riblji restoran), čija je izgradnja sasvim uklopljena u Regulacioni plan centra. Ovom odlukom definitivno su uklonjene smetnje za početak izgradnje tog prostora i uklanjanje višegodišnjeg rugla grada. Na potezu su investitori.

Uz više amandmana vijećnici su jednoglasno usvojili Odluku o kriterijima, načinu i postupku raspodjele sredstava iz granta za projekte mladih koji se finansiraju i sufinansiraju sredstvima Budžeta općine.

Kao i obično, pozornost vijećnika posebno je bila usmjerena na Izvještaj o izvršenju Budžeta Općine Gračanica za prvo po-

lugodište 2010. godine, koji usljed recesije podbacuje više nego što se očekivalo. Pažnju privlače sljedeći podaci: Budžet za 2010. godinu planiran je u iznosu od 11.136.000 KM, a za prvih šest mjeseci, ostvaren je u iznosu od 4.569.294 KM ili 82,06 %. Prihodi su ostvareni u iznosu od 4.116.587 KM – 87,35 % ili manji za 595.913 KM (od toga su: porezni prihodi 3.063.669 KM ili 90,13 %, dakle manji za 335.331 KM; neporezni prihodi 924.368 KM ili 97,46 %, dakle manji za 24.132 KM i tekuće potpore 128.550 KM ili 35,22 %, dakle, manji za 237.450 KM; primitci su ostvareni u iznosu od 452.707 KM, što je u nivou plana).

Najveći pad prihoda je na porezu za zaostale obaveze po propisima do 31. 12. 2008. godine (55 % manje) i porezu na dobit od privrednih i profesionalnih djelatnosti (68 % manje). To je porez od samostalnih zanimanja, koji pripada općinama, dok je porez na dobit od pravnih lica koji pripada državi i entitetima ostvaren iznad plana.

Kako je u svom uvodnom obrazloženju pojasnio Općinski načelnik Nusret Helić, razlika između prihoda i primitaka i izdataka sa servisiranjem duga (budžetski suficit) za šest mjeseci iznosi 103.821 KM. Dakle, potrošeno je manje za 103.821 KM. Dakle, tekući izdaci su realizovani u iznosu od 3.057.969 KM, što čini 78,24 % ukupnih izdataka. Za 2,74 % manje od planiranih, a za 1,2 % su veći u odnosu na isti period prošle godine. Prema tome, realizacija budžeta za prvih šest mjeseci ove godine kretala se u skladu sa ostvarenim prihodima i prioritetima, kako je to i utvrđeno Odlukom o izvršenju Budžeta. "Trošili smo onoliko koliko smo imali i nismo ušli u deficit", zaključio je svoje izlaganje Općinski načelnik.

5. 9. 2010.

**"KOVAN" – DOBIO PRESTIŽNO PRIZNANJE
NA 8. MEĐUNARODNOM EKOLOŠKOM
SAJMU "EKOBIS 2010." U BIHAĆU**

Organizator Sajma (od 2. do 5. septembra), bila je Privredna komora Unsko-sanskog kantona, pod pokroviteljstvom Fe-

deralnog ministarstva okoliša. Na sajmu se predstavilo više od 250 izlagača sa suizlagačima iz zemlje i inostranstva. Među njima posebno interesovanje izazvala je postavka gračaničke firma "Kovan", koja je sa ovog sajma ponijela još jedno prestižno priznanje za kolekciju kotlova i kamina na biomasu "pelet". "Dobro je što se kod građana sve više budi ekološka svijest", ne krijući zadovoljstvo, izjavio je za BKC portal direktor ove firme Said Karalić. (portal BKC)

26. 9. 2010.

**NA POLJOPRIVREDNOM DOBRU "RATAR"
U STJEPAN POLJU: PRVA IZLOŽBA
STOČARSTVA GRAČANICA-DOBOJ ISTOK**

Inicijativa za organizovanje ove izložbe potekla je od poljoprivrednih proizvođača iz Gračanice i Doboj Istoka, okupljenih oko ZZ Gračanka, koja je i bila organizator ove smotre stočarske proizvodnje sa šireg područja Gračanice. Na izložbi su učestvovali poljoprivrednici, poljoprivredna društva, predstavnici prehrambene industrije i prometcnici repromaterijala, te više gostiju iz resornih ministarstava, poljoprivrednih zavoda i lokalne zajednice. Ocjena učesnika je da je izložba ostvarila svoje glavne ciljeve: afirmacija poljoprivredne proizvodnje, uspostavljanje poslovnih kontakata, poboljšanje ambijenta za poljoprivredne proizvođače i očuvanje tradicije. Organizatori su dodijelili prigodne nagrade i priznanja najboljim proizvođačima iz oblasti stočarske proizvodnje na ovom području. S razlogom se može očekivati da će ova izložba sljedeće godine biti još bolja i sadržajno bogatija.

3. 10.2010.

**OPĆI IZBORI 2010. – GLASALO 60%
PUNOLJETNIH GRAĐANA**

...što je više od očekivanja nekih analitičara, koji su analizirali rezultate predizbornih anketa i raspoloženja građana. Izbori su protekli bez ikakvih incidenata. Sve je prošlo sa nekoliko prijava Općinskoj izbornoj komisiji za sitnije prekršaje tokom biračkog procesa. Nekoliko sati poslije zatvaranja biračkih mjesta, u "izbornom stožeru" op-

ćinskog SDP počelo se slaviti. Prema izvještajima izvještača bilo je jasno da je SDP apsolutni pobjednik na opštini.

8. 10. 2010.

**SOS DJEČIJA SELA BIH: OBILJEŽAVANJE
DJEČJE NEDJELJE – "SUSRETI DJECE
BOSNE I HERCEGOVINE" U GRAČANICI**

Riječ je o trodnevnoj manifestaciji, na kojoj su se svojim stvaralaštvom (muzika, slikarstvo, gluma, sport) predstavila djeca bez roditeljskog staranja, koja odrastaju pod takozvanom javnom brigom iz 10 gradova Bosne i Hercegovine (njih oko stotinjak, sa svojim vaspitačima). Priredbe i takmičenja u okviru susreta organizovane su u prostorijama BKC, sportskoj Sali "Luke" i Druge osnovne škole, a domaćin je bilo SOS dječije selo u Gračanici. U sklopu manifestacije, predstavljena je i publikacija "Važno je da znate, životne priče i preporuke mladih koji imaju iskustvo javne brige", sa diskusijom na temu podrške mladima koji napuštaju ili gube status šticićenika "javne brige". Promotor publikacije bio je dr. sc. Omer Hamzić, a moderator Jasna Sofović, nacionalna savjetnica za zastupanje prava djece iz SOS dječije selo BiH Sarajevo.

14. 10. 2010.

**"GRAČANIČKO KERANJE" – IZLOŽBA U
ISLAMSKOM CENTRU U ZAGREBU.**

Nakon prigodne pozdravne riječi predsjednice Vijeća žena MIZ-e Zagreb, gđe Azre Omanović, organizatora izložbe i gđe Azemine Ahmedbegović, predsjednice Udruženja "Gračaničko keranje", o etnološko-historijskim i tradicijskim vrijednostima i umjetničkim dometima i specifičnostima gračaničkog keranja, prije otvaranja izložbe govorili su dr.sc. Omer Hamzić, glavni i odgovorni urednik Časopisa "Gračanički glasnik" i mr. sc. Rusmir Djedović, stručni savjetnik za zaštitu kulturnog i prirodnog nasljeđa Tuzlanskog kantona. Uz prigodno obraćanje, izložbu je otvorila Azra-hanuma Cerić, na čiju je inicijativu ova izložba i organizovana.

Zasluge za uspješno postavljenu i posje-

čenu izložbu svakako ponajviše pripadaju vrijednim ženskim rukama koje su sve svoje zamisli i ideje pretočile u vrhunska umjetnička djela. Mnoge od njih bile su prisutne otvorenju izložbe i nisu krile zadovoljstvo i oduševljenje što su baš njihovi kerani stolnjaci, tabletići, maramice, rukavice, šamijice, mahrame, salвете, torbice, šeširi, ali i kerani nakit našli svoje mjesto na izložbi.

Pred mladom kreatoricom, dizajnericom odjeće i slobodnom umjetnicom Almom Medić bio je izazov postavljanja ove izložbe. Na njega je odgovorila izuzetno odgovorno, profesionalno i na zavidan način, o čemu su posvjedočili brojni posjetitelji iz Gracanice i Zagreba.

15. 10. 2010.

BABIĆI: SVEČANO PUŠTENA U PROMET DIONICA ASFALTIRANOG PUTA ZVIJEZDA-KAMENOLOM

...dužine 1.480 i prosječne širine 6 metara. U ovu investiciju uloženo je 313 hiljada konvertibilnih maraka, prva dionica koštala je 168 hiljada KM, a druga 145 hiljada KM, učesće građana je 65 hiljada KM. Simboličnim presijecanje vrpce put su otvorili načelnik Općine Gracanica Nusret Helić i predsjednik Vjeca MZ Babici Edin Šehić.

15. 10. 2010.

TOPLIFIKACIJA GRAČANICE: UGAŠENI NAJVEĆI DIMNJACI-ZAGAĐIVAČI U CENTRU GRADA, ASFALTIRANE GLAVNE GRADSKJE I NEKOLIKO PRIGRADSKIH SAOBRAĆAJNICA

Iako su mnogi projekti infrastrukture, rekonstrukcije ulica, kanalizacionih i vodonih sistema bili ranije predviđeni, činjenica je da je toplifikacija jezgra Gračanice i provođenje magistralnog toplovoda kroz centar Gračanica, znatno ubrzala te projekte i pokrenula, ne samo javna preduzeća, već i druge privredne subjekte, pa i pojedince da pristupe uređenju svojih prilaza, da iskoriste priliku i "raskopaju", dok se raskopava... u zadnje vrijeme ne pamti kada se ovoliko gradilo... možda još od 1988. i 1989. godine, kada se temeljno rekonstruisala centralna ulica i definitivno sanirala Osman-kapetanova medresa u centru grada.



Do početka ovogodišnje grejne sezone, na centralni toplovod, koji je konačno "stigao" do "šarene kuće" (općine), ugašeni su dimnjaci u Osnovnoj školi "Hasan Kikić", Drugoj osnovnoj školi, Srednjoj mješovitoj i Gimnaziji, koje su priključene i već se zagrijavaju iz Eko toplane Gračanica. Priključena je i zgrada Općine, a uskoro treba da se priključi i zgrada Općinskog suda, Centra za socijalni rad i Bosanskog kulturnog centra. Već sada u Gračanici se lakše diše.. Odobrenjem sredstva za uvođenje ekološkog grijanja u 2 srednje i 2 osnovne škole u Gračanici, u iznosu od cca 50.000 KM Kantonalno ministarstvo prostornog uređenja i okoliša dalo je veliki podsticaj za dalji razvoj projekta toplifikacije Gračanice. Ovaj, uistinu, historijski infrastrukturni projekat, "težak" 15.000.000 KM, razvija se manje-više, predviđenom dinamikom, uz sve teškoće i nerazumijevanja, koja prate sve velike projekte kod nas. Samo tokom ove godine u toplovod od raskrsnice za Ritašiće (Šakovića kovačnica), do opštine, odnosno do centra grada, uključujući i ugradnju priključaka i podstanica u privatne i javne objekte, uloženo je oko 1.100.000 KM.

U svakom slučaju, postavljanjem magistralnog toplovoda i priključkom većih potrošača u centru grada, stvoreni su uslovi za dalji razvoj toplifikacije ostalih dijelova

grada u narednom periodu (Bazen, Lamele, Hadžistevići, Malta, Drafnići).

Nakon "prolaska" toplovođa i ostalih "prokopavanja", izvršena je temeljna sanacija i rekonstrukcija glavnih ulica i trotoara u centru grada: Kej Fridriha Foglara, ulica Ahmed-paše Budimilije, ranije Fatihova, kroz koju je prošle godine "izvedena" Japaga (od skvera do raskrsnice u Potok mahalju), te ulica 22. divizije (od raskrsnice do kafića "As". Radi se o velikom projektu u koji je uloženo preko 350.000 KM budžetskih sredstava..

Već je asfaltirana dionica puta koji vodi prema bazenima "Terme" u dužini od 340 metara. Na tom dijelu, usput su postavljene i nove vodovodne cijevi. Uloženo je oko 70.000 KM iz budžeta i od nekoliko privrednika. Već su obezbijedena sredstva u iznosu od 120.000 KM za nastavak izgradnje te saobraćajnice sve do kupališta "Terme". U ovoj godini sanirat će se konačno i prilaz Dječjem obdaništu – jedne od najugroženijih ulica u gradu. Predviđena su minimalna ulaganja od 20.000 KM.

Iz programa rekonstrukcije putne mreže na općini, koji se realizovao u posljednje dvije godine, izvršeno je asfaltiranje preostalog dijela puta u dužini od 400 m kroz Kamenolom (prema Babićima), u što je uloženo 70.000 KM, zatim asfaltiranje lokalnog putnog pravca prema Piskavici, te kroz samu mjesnu zajednicu u dužini od 1.400 metara. (uloženo oko 160.000 KM iz Budžeta općine). Završena je i temeljna sanacija puta od Gračanice prema Malešićima – kroz Lendiće, do kamenoloma u dužini od 1,2 KM.. U izgradnju ovog puta izvršena su ulaganja iz općinskog budžeta u iznosu od 250.000 KM.

27. 10. 2010.

22. SJEDNICA OPĆINSKOG VIJEĆA GRAČANICA: KAKO USPOSTAVITI ZONE SANITARNE ZAŠTITE IZVORIŠTA PITKE VODE NA PODRUČJU SOKOLA

Radi se o regulisanju vrlo krupnih problema sanitarne zaštite i zaštitnim mjerama za izvorišta Vrela i Ilidža u Sokolu i Nacrtu

prvog dokumenta kojim bi se regulisalo ovo, po svemu, vrlo osjetljivo pitanje. Kratka, ali žustra rasprava pokazala je da se ovim dokumentom moraju pomiriti interesi stanovništva i vlasnika parcela u predviđenim zonama sanitarne zaštite izvorišta (zabrana gradnje i sl.) i opći interesi i zakonski propisi, koji nalažu sanitarnu zaštitu izvorišta sa kojih vodu pije dvadesetak hiljada stanovnika. Ni sami izvjestioci po ovoj tački dnevnog reda nisu mogli reći da li je kvalitetne odgovore na ta pitanja dao Elaborat o zaštiti izvorišta na teritoriji općine Gračanica, koji je radila odgovarajuća stručna institucija, čiji predstavnik nije ni bio prisutan na ovoj sjednici. Kako nije bio spreman za dalju raspravu, predlagач se odlučio da Nacrt ove odluke povuče na doradu.

U nastavku, vijećnici su usvojili: Odluku o utvrđivanju uslova, kriterija i postupka dodjele stipendija učenicima srednjih škola i studentima, Informaciju o zaposlenosti i zapošljavanju na općini Gračanica za period januar-juni 2010. godine, Informaciju o provođenju i primjeni odluke o vršenju komunalnih djelatnosti i komunalnom redu, Informaciju o legalizaciji bespravno izgrađenih objekata na području općine Gračanica, te raspravljali o Nacrtu Zakona o zaštiti od požara i vatrogastvu na području TK.

2. 11. 2010.

"GRAČANIČKO KERANJE" DOBILLO SVOJU "ZEMLJOPISNU OZNAKU"

Nakon prilično dugotrajne procedure, Institut za intelektualno vlasništvo Bosne i Hercegovine donio je rješenje kojim se priznaje zemljopisna oznaka "Gračaničko keranje" za ručni rad keranje – kao poseban način izrade čipke običnom iglom za ručno šivanje i tankim koncem, najčešće drap ili bijele boje, pomoću kojih se izrađuju različite vrste mustri posebnom tehnikom, zvanom "keranje". Dobijanjem zemljopisne oznake, ovaj autentični proizvod kućne radinosti registrovan je kod Instituta za intelektualno vlasništvo i trajno zaštićen od svojatanja i plagijata.